

# 28 peninju Muay Thai rebut gelaran 'King Of The Ring'

Oleh **ABDUL RAZAK IDRIS**

**PERTARUNGAN** antara jaguh Muay Thai negara, Mohd. Rafi Abdul Manaf yang lebih dikenali Mat Ropi menentang Muhammad Kittyamat @ Deankao San menjadi tumpuan pada Cabaran 'King Of The Ring' Muay Thai JWP-Kuda Merah 2024.

Pertandingan anjuran Kelab Muay Thai Kuda Merah Kuala Lumpur ((KMKMKL) sempena Sambutan Hari Wilayah Persekutuan itu akan berlangsung selama dua hari di Stadium Titiwangsa Kuala Lumpur bermula Sabtu ini.

Menurut Presiden KMKMKL, Rosli Yaacob berkata, kejohanan yang memasuki edisi ke-73 itu akan menampilkan 28 peninju



**ROSLI (belakang, lima dari kiri) bergambar bersama antara peserta yang akan mengambil bahagian pada kejohanan bermula Sabtu ini.** – ABDUL RAZAK IDRIS

terbaik dari dalam dan luar negara.

Katanya, Mat Ropi yang me-

wakili Kelab Muay Thai Kuda Merah Polis Diraja Malaysia (PDRM) menentang Deanko dari Kelab

Muay Thai Red Wolves Thailand menjadi antara pertarungan bakal dinanti-nantikan oleh para peminat.

"Sejak dua bulan lalu perlawanan yang dijadualkan melibatkan dua jaguh ini telah menjadi perbualan hangat di media sosial.

"Pastinya ramai yang menunggu perlawanan ini nanti kerana Deankao San juga banyak memenangi kejohanan di Kemboja dan Thailand baru-baru ini," katanya pada sidang akhbar di Shah Alam semalam.

Mat Ropi pernah mencapai rekod tanpa kalah dalam beberapa kejohanan antarabangsa sebelum ini sehingga diangkat sebagai Ikon Anak Kelantan 2022.

Tambah Rosli, kejohanan dengan kerjasama Jabatan Wilayah Persekutuan dan Dewan Bandaraya Kuala Lumpur itu akan menawarkan wang tunai dan tali pinggang kepada para pemenang.

Sementara itu, pertarungan peserta wanita yang dijangka sengit membabitkan pertemuan Damia Khaulah dan wakil Kelab Muay Thai Head Hunter Perak, Raja Izzati Raja Annuar yang merupakan peninju No.1 negara bagi kategori 48 kilogram.

"Pemenang terbaik akan dipilih untuk beraksi di Grand Final Kuda Merah pada 16 hingga 17 November depan di venue yang sama. Setakat ini 10,000 tiket kejohanan telah habis dijual," ujarnya.